

司馬府志

西安府志卷七十

藝文志下

詔

罷作昌陵詔

永始元年

漢成帝

詔曰朕執德不固謀不盡下過聽將作大匠萬年言昌陵三年可成作治五年中陵司馬殿門內尚未加功天下虛耗百姓罷勞客土疏惡終不可成朕惟其難怛然傷心夫過而不改是謂過矣其罷昌陵及故陵勿徙吏民令天下無有動搖之心

徙請作昌陵大匠詔

永始二年

前將作大匠萬年知昌陵卑下不可爲萬歲居奏請營作

建置郭邑妄爲巧詐積土增高多賦斂繇役興卒暴之作
卒徒蒙辜死者連屬百姓罷極天下匱竭常侍閤前爲大
司農中丞數奏昌陵不可成侍中衛尉長數白宜早止徙
家反故處朕以長言下閤章公卿議者皆合長計首建至
築閤典主省大費民以康寧閤前賜爵關內侯黃金百斤
其賜長爵關內侯食邑千戶閤五百戶萬年佞邪不忠毒
流衆庶海內怨望至今不息雖蒙赦令不宜居京師其徙
萬年敦煌郡

追賜朱勃子穀詔

後漢
明帝

告平陵令丞縣人故雲陽令朱勃建武中以伏波將軍爵
土不傳上書陳狀不顧罪戾懷旌善之心有烈士之風詩

云無言不讎無德不報其以縣見穀二千斛賜勃子若孫
勿令詣闕遠謝

移都城於龍首山詔

隋文帝

朕祇奉上元君臨萬國屬生人之弊處前代之宮常以爲
作之者勞居之者逸改創之事心未遑也而王公大臣陳
謀獻策咸云義農以降至于姬劉有當代而屢遷無革命
而不徙曹馬之後時見因循乃末代之宴安非往聖之宏
義此城從漢以來雕殘日久屢爲戰場舊經喪亂今之宮
室事近權宜又非謀筮從龜占星揆日不足建皇王之邑
合大衆所聚論變通之數稽幽顯之符同心固請情詞深
切然則京師百官之府四海歸向非朕一人之所獨有苟

利於物其可違乎且殷之五遷恐人盡死是則以吉凶之
土制長短之命謀新去故如農望秋雖暫劬勞其究安宅
今區宇寧一陰陽順序安安以遷勿懷胥怨龍首山川原
秀麗卉物滋阜卜食相土宜建都邑定鼎之基永固無窮
之業在斯公私府宅規模遠近營構資費隨事條奏

拜昭陵赦醴泉免縣租調詔

永徽六年唐

高宗

朕躬膺大寶嗣隆景業虔奉成則光闡洪猷昧旦兢懷分
宵動慮蒼昊垂祐宗社降靈順黎元之心藉忠賢之力俗
登仁壽道暨升平遠肅邇安時康俗阜履端受節陽和肇
氣親率庶僚奉謁凌寢遺弓永慕切終身之憂撫鏡纏悲
興寒泉之思敬深如在哀隆罔極薦享既畢精禮獲申式

表因心宜宏愷澤可曲赦醴泉縣并行從人大辟罪已下
皆赦除之百姓宜免今年租調右監門員外將軍嘗基在
此宿衛進爵一等令陵丞各加一階并節級賜物

褒魏知古諫獵渭川手詔

先天元年

元宗

朕頃向溫泉觀省風俗時因暇景掩渭而畋方開一面之
羅式展三驅之禮躬親校獵聊以前禽豈意卿有箴規輔
予不逮今賜物五十段用申勸獎

免新豐雜科詔

開元元年

詔曰惟此新豐溫湯是出古之順豫義兼巡省頃者觀風
數臨茲地以察冤滯詢於故老閭里歡康田疇墾闢况冬
隆積雪春期有年且誦王遊果符時邁雖千乘萬騎咸給

于主司而累月再來頗勤于除掃宜下復蠲之令慰其望
幸之心新豐縣百姓免一年雜差科

以稻田給貧民詔

開元二十六年

制曰京畿之內雜役殷繁言念劬勞豈忘優恤頃以櫟陽
等縣地多鹹鹵人力不及便至荒廢近者開決皆生稻苗
亦旣成功豈專其利京兆府界內應雜開稻田並散給貧
丁及逃還百姓以爲永業

昭陵皇堂有光赦京兆關輔詔

大歷五年

代宗

古者以季春之月布德行惠卹刑振乏朕親執犧牲玉帛
獲奉於上帝神祇九年於茲矣克己思理明不能燭昆夷
未敘王畧猶虞歲會三秦之師日有千金之費悉索敝賦

被於餽軍侯甸之間徵求耗竭百穀翔貴關中小歉窮則
斯濫安能懼刑困而成盜多有犯法至于軍戎之事致使
廩賜不充囚之逃亡或抵邦憲事非獲已情亦可察近以
露濡之感明發有懷屬禁火之令節方薦鮪於園寢聖祖
敷佑景靈告祥先天後天載荷嘉貺以陰以雨又助發生
固宜順曲成之仁布維新之命赦罪育物曠然滌除其京
兆府三輔并京城內諸司諸使見禁囚犯死罪已下特宜
釋放其有犯未發覺者罪無輕重一切放免如妄有論告
以其罪罪之其官典犯贓不在免限頃者魚朝恩夙有功
勲委之戎事而徵求黎庶空竭閭閻加之廣有貿易奪人
賄利京城之內擅致刑獄恣行忍虐幽執無辜部領師人

乖於撫馭資糧刻薄勞役煩苛惡稔豐盈自嬰沉痾念其
勲舊許以幽閑令罷兵權遂其養疾而宗社降鑒神明所
殛羸瘵不起旋至斃亡既往無追一切不問所管將士等
同坐於王事各効忠勤是朕爪牙自致勲業並宜仍舊勿
有憂懼益以朕誠乖感物明未知人失於授任而致此也
今則虛懷引咎親御禁戒特加優寵以表勞績其資聖寺
禁人並追捕勘責等卽宜並停然以王畿艱弊矜恤疲人
蠲稅罷徭與之休息尚恐流庸罕復貧弱未安益用憂勤
諒茲損約京兆府百姓承前應欠負官物等委所由勘責
實在百姓腹內者一切放免其在所由腹內者不在放限
畿內官人手力資課及府官充職掌名額稍多務令減省

原书缺页

原书缺页

原书缺页

原书缺页

擬幸新豐及同州勅

蘇頌

虞之四朝且編區寓漢之三輔本同京師善于古者考于
今發乎邇者應乎遠若順豫之事缺則紊於王制巡遊之
典備則慮於人勞朕受命膺期勵精設教幸乾坤幽贊風
雨咸若百物既阜三農已登同穎薦於宗廟穰穗生於郡
國我無大桀實欣於歲取人有小康未果於時邁但左翊
之地近入黃圖新豐之邑甫鄰青綺山川宮館咫尺相望
欲過灞亭而涉戲經沙阜而臨渭見彼耆耄問其疾苦察
長吏之政恤黎甿之冤蓋所以展義陳詩觀風問俗始自
畿甸化於天下宜以今月二十五日幸長春宮停五日緣
頓所須並令所司支備一事以上不得干擾州縣發日惟

量將飛騎萬騎行更不須別遣兵馬及妄有科喚朕此行之處不得進奉在路有稱冤苦州縣不能疏決者委御史金吾收狀爲進各勉所職副朕意焉

制

幸長安制

唐
蘇頲

門下觀俗省方所以愛人治國尊崇廟貌所以事神享親
欽若筥典此言大哉朕祇膺鴻業積念咸秦去歲欲幸洛
京已發成命旋屬重營太廟因將中止誠以其繩則扳功
且未卽展軫效駕信弗可違終肆覲於東方恒載馳於西
土流暑不駐通喪永畢象居始成如在增慕朕之前志日
夕匪遑故可以詩陳肅雍禮極禋祀神明之與時惟雍州

稼穡有年莫若關輔王假用吉后來其蘇實獲我心俾從人欲可以今年十月取北路幸長安所司準式務在節省無得勞費主者施行

幸西京制

張九齡

勅朕所時邁皆順物情頃屬關輔無年遽爾東幸固非爲已將以息人今百穀旣成庶務皆省而五陵所奉誠在京師安可更留周南有關時薦宜以來年正月七日取南路幸西京所司準式應行幸所須務從節減所由明爲條例勿使勞煩

減徵京畿夏麥制

常袞

勅夏后氏五十而貢殷人七十而助周人百畝而徹其實

皆什一也故謂之天下中正而頌聲作矣廼者因三代之
制定其稅典務於行古庶以便人屬外攘四夷歲會戎事
軍國用度公儲匱乏役費荐至近於倍征而吏或奉法不
謹失我字人之意孤惻者恣其厚斂豪富者貸以輕徭動
而生奸浸以流弊謂之什一其實大半致有去父母之邦
甘傭保之役流離遺蕩靡室靡家或貼於死亡而莫之省
每一念至良深憫惻頃亦釐革從其便安量沃瘠之差寬
賦斂之重今邦畿之內宿麥非稔去秋墾田又減常歲昨
者徵稅其數頗多朕以萬姓不安三農將廢憂勤鬱悼中
夜以興思有康濟未臻其道每欲悉免量入息其重困而
未解兵嚴猶資日費用蠲恒數以恤疲人其京兆府今年